

# Komunidade afetada ba perfurasaun posu Feto Kmaus rekomenda pontu balun ba Timor Resources



Gerente Timor Resources, Filomeno Andrade. Foto/Celestina Teles.

**COVALIMA, 23 Abril 2024 (TATOLI)** – Rezultadu diálogu entre comunidade afeitada ho empreza petrolífera *Timor Resources* rezulta pontu balun ba perfurasaun posu foun Feto Kmaus-Karau ne'ebé lokaliza iha área Igreja Ave Maria Suai nia oin, iha suku Debos, postu Suai.

Rekomendasaun sira ne'e mak comunidade aseita atu halo perfurasaun, kria empregu, lahalo indemnizasaun, aluga rai, no hafoin perfurasaun termina comunidade fila bá hela fali iha sira-nia fatin.

“Posu mina ne'ebé atu halo tan perfurasaun, ami hala'o sorumutu ho comunidade no sira pruntu atu entrega fatin ba empreza atu halo perfurasaun, maibé comunidade afetada mós hato'o sira-nia rekomendasaun ba Timor Resources molok hala'o atividade perfurasaun”, Gerente *Timor Resources*, Filomeno Andrade, hateten ohin.

Nia dehan, *Timor Resources* mós hasoru malu ona ho ekipa interministeriál hodi halo ona levantamentou dadus, hafoin nia rezultadu ne'e empreza relata ba Autoridade Nasionál Petróleu (ANP).

Iha sorin seluk, Diretor Terra no Propriedade Covalima, Carlos Caetano, hateten ekipa interministeriál ne'e kompostu husi Terra no Propriedade Covalima, Ministériu Obra Pública (MOP), Ministériu Turizmu no Ambiente, Polísia Nasionál Timor-Leste (PNTL) no autoridade lokál hodi halo levantamentou dadus ba comunidade afetada ba perfurasaun posu Feto Kmaus.

“Levantamentu dadus durante loron rua ne'e ita identifika rai Estadu abandonadu no rai privadu, nune'e bele uniformiza dadus no Timor Resources submete ba Ministériu Petróleu hodi hetan desizaun no orientasaun kona-ba prosesu perfurasaun, oinsá atu fó indemnizasaun ka ajuda ba comunidade afetada direta ba prosesu perfurasaun posu Feto Kmaus”, nia dehan.

Rezultadu levantamentou dadus identifika parsela rai 31, hosi número ne'e 23 kategória rai privadu no ualu rai abandonadu ne'ebé na'in-noon ativa selu arrendamentu no rua la selu taxa ba Estadu.

Lembra katak perfurasaun ba posu Karau-1/Feto-Kmaus-1 hala'o iha 25 Outubru 2021, maibé empreza australiana *Timor Resources* deside taka iha dezembru tinan hanesan tanba bazeia ba teste laiha valór komersiál.

Depois ida ne'e, empreza petrolífera ne'e halo preparativu hodi hakat ba perfurasaun posu foun ne'ebé lokaliza iha munisípiu referidu hodi konfirma deskoberta mina ne'e iha valór komersiál hodi halo preparativu hotu hodi bele halo perfurasaun konfirmasaun, nune'e mós peskiza ne'ebé mak sira planeia ona iha 2024.

**Jornalista: Celestina Teles**

**Editora: Maria Auxiliadora**

# Timor Resources diálogu ho comunidade afetada ba perfurasaun posu Feto Kmaus



Komunidade afetada rona informasaun husi Timor Resources. Imajen /Celestina Teles.

**COVALIMA, 11 Abril 2024 (TATOLI)** – Empreza *Timor Resources* halo diálogu ho comunidade afetada ba perfurasaun posu Feto Kmaus-Karau, iha suku Debos, postu Suai, hodi rona sira-nia ideia.

Jerente *Timor Resources*, Filomeno Andrade, informa katak iha estudu preliminaríu ne'ebé *Timor Resources* halo nia rezultadu teste hatudu katak mina-matan Feto Kmaus atu halo tan perfurasaun, tanba ne'e molok realiza ida ne'e presiza rona populasaun nia hanoin, nomós parte ida atu hetan dadus husi família afetada sira.

“Oinsá sira-nia hanoin kona-ba mina-matan ne'ebé estudu hatudu sei hala'ó perfurasaun [posu] Feto Kmaus to'ó iha Vila nia klaran. Timor Resources hasoru malu ho comunidade afetada hanesan parte ida mós atu foti dadus nune'e relata ba Autoridade Nasionál Petróleo [ANP] no bainhira autoridade sira tuun comunidade iha ona informasaun”, Filomeno Andrade hateten iha salaun Igreja Ave Maria Suai, ohin.

Nia esplika katak *Timor Resources* tenke halo tan perfurasaun to'ó Vila, iha igreja nia oin, iha comunidade nia leet, tanba mina-matan nia lihun tolu ho nivel ketaketak to'ó iha fatin ne'e.

Iha sorin seluk, abitante afeitadu Deonísio de Araújo, hatete empreza atu halo perfurasaun mina iha kedan nia uma sorin no nia pruntu atu koopera. “Hanesan timoroan, atu halo dezentimentu ba ita-nia nasaun, liuliu iha Covalima ita kontribui, maibé empreza tenke trata comunidade afetada ho digna”, nia sujere.

Diretór Servisu Munisipál Terra no Propriedade Covalima, Carlos Caetano, reforsa katak diálogu ne'e atu comunidade afetada ba perfurasaun mina-matan Feto Kmaus informada no bainhira ekipa halo levantamentu dadus ba sira iha ona preparasaun.

Tuir dadus Terra no propriedade Covalima, rejista parsela rai privada 38 no rai Estadu nian ualu ne'ebé tama iha área perfurasaun posu Feto Kmaus.

Lembra katak perfurasaun ba posu Karau-1/Feto-Kmaus-1 hala'ó iha 25 Outubru 2021, maibé empreza australiana *Timor Resources* deside taka iha dezembru tinan hanesan tanba bazeia ba teste laiha valór komersiál.

Depois ida ne'e, empreza petrolífera ne'e halo preparativu hodi hakat ba perfurasaun posu foun ne'ebé lokaliza iha munisípiu referidu hodi konfirma deskoberta mina ne'e iha valór komersiál hodi halo preparativu hotu hodi bele halo perfurasaun konfirmasaun, nune'e mos peskiza ne'ebé mak sira planeia ona iha 2024.

Timor Resources sai hanesan operadór ba kontratu partilla produsaun TL-OT-17-08 no TL-OT-17-09 hamutuk ho nia parseiru Timor Gap Onshore Blocks Unip. Lda.